

PAGTULON-AN 6 – PAGPANAW DIHA SA DALAN SA SAAD

Genesis 12-22

TEMA: Pagpakita sa pagkamatinumanon sa Dios ug ang ganti sa pagtoo sa mga saad sa Dios.

Unsaon nimo pagtubag kini nga pangutana: Imo bang gituman ang imong gihimong mga saad? Tingali wala ka makatuman sa imong mga gisaad, apan ang Dios matinumanon gayud sa *kanunay*. Ang kamatuoran, adunay usa ka butang nga dili mahimo sa Dios, ang pagpamakak, Tito 1:2. Liboan man ka mga katuigan ang molabay usa pa matuman ang Iyang mga saad, apan sigurado gayud nga ang Iyang gisaad matuman, Heb. 6:13-18.

Nahinumdom ka ba didto sa sinugdanan sa *ANG DALAN SA KINABUHI*, ang Dios naghimo ug saad ngadto kang Adan ug Eba didto sa Genesis 3:15? Ang Dios miingon, adunay adlaw na muabut diin ang usa ka Manunubos moanhi aron sa pagbuntog kang satanas. Apan ang katawhan misimang ngadto sa pagkadautan ug wala nay matarung nga mga tawo, nga pinaagi kaniya ang Dios makahimo sa pagbuhat. Atong makita nga si satanas murag nagmadaugon. Apan nakadaug ba gayud si satanas? Pinaagi sa pagliko sa wala sa *ESKINA SA KALIBUG* diha sa atong mapa, atong makita kon unsa ang nahitabo.


Ang Dios mitan-aw sa tanang mga kanasuran ug mipili kang *ABRAM* diin pinaagi kaniya Iyang pagahimoon ang Iyang katuyoan:

- a) Si Abram usa ka Gentil, dili Judeo, sa dihang nakigsulti ang Dios kaniya didto sa Ur sa mga Caldeanhon (Buhat 7:2-4) ug didto sa Haran (Genesis 12:1-3).
- b) Si Abram mitoo sa Dios ug kini giisip ngadto kaniya nga pagkamatarung, Genesis 15:6, Roma 4:3, 22.
- c) Ang Dios misaad ug anak ngadto kang Abram, Genesis 15:2-6.

Aron sa pagtuman sa tawag sa Dios kaniya, si Abram mipanaw ngadto sa yuta sa Canaan, Genesis 12:5. Daghang mga katuigan ang nanglabay ug ang ngalan ni Abram giusab sa pangalan nga Abraham didto sa Genesis 17:4-5. Ug ang ngalan sa asawa ni Abraham nga si Sarai giusab sa pangalan nga Sarah, Genesis 17:15. Siya ug si Sarah nagakatigulang na, ug tungod niana imposible na gayud mahimo pa nga sila makabaton ug anak. Apan ang Dios wala makalimut sa Iyang gisaad ni Abraham. Human sa daghang mga katuigan nga paghulat, ang gisaad nga si Isaac natawo. Ang Dios mihulat aron tumanon Niya ang Iyang saad, aron nga kining bata mahimong *milagro nga bata*. Ug sa mao usab nga panahon, ang Dios nagasulay sa pagtoo ni Abraham. Si Abraham nakapasa sa pagsulay sa Dios; atong mabasa sa Roma 4:20, nga si Abraham wala mibiya sa mga saad sa Dios.

Si Isaac mitubo nga usa ka ambongan nga lalaki. Ug unya miabut ang adlaw nga ang Dios mihatag sa labing daku nga pagsulay kang Abraham. Gusto sa Dios makita kon si Abraham nahigugma ba sa Dios labaw pa sa iyang kaugalingong anak nga si Isaac, Genesis 22:12.

Ang Dios misulti kang Abraham nga nagaingon, “Kuhaon mo karon ang imong anak, ang imong bugtong anak nga imong pinalangga nga si Isaac ug umadto ka sa yuta sa Moria, ug siya ihalad mo nga halad nga sinunog didto sa ibabaw sa usa sa mga bukid nga Akong igaingon kanimo,” Genesis 22:2. Usa kini ka malisud nga pagsulay, apan ang Bibliya nagatug-an kanato nga si Abraham Nahinumdom sa mga saad sa Dios nga Siya magapanalangin sa kalibutan pinaagi sa iyang kaliwat. Si Abraham nasayud nga ang Dios makahimo sa pagbanhaw ni Isaac gikan sa kamatayon; bisan kon ang kinabuhi niini Iyang kuhaon, Heb. 11:17-19. Ug gituy-od ni Abraham ang iyang kamot, ug gikuha niya ang iyang punyal sa pagpatay sa iyang anak. Ug ang manolunda ni Jehova misinggit kaniya gikan sa langit, nga nagaingon: “Abraham, Abraham.” Ug siya mitubag, “Ania ako” ug nagaingon: “Dili mo pagbakyawon ang imong kamot batok sa bata, dili ka magbuhat kaniya bisan unsa; ug karon naila ko nga ikaw nahadlok sa Dios, kay wala ka magdumili sa imong bugtong nga anak Kanako.” Genesis 22:10-12.



Tinubdan: Sweet Publishing – kini ilustrasyon lamang sa Genesis 22:10-12

Ug giyahat ni Abraham ang iyang mga mata ug mitan-aw, ug ania karon, ang usa ka karnero nga lake, kansang mga sungay nagapus sa kasampinitan. Ug miadto si Abraham ug gikuha niya ang karnero ug kini iyang gihalad ingon nga halad nga sinunog puli sa iyang anak, Genesis 22:13. Ang maong dapit gihinganlan ni Abraham nga Jehovah-jireh nga ang buot ipasabut, “*sa bukid ni Jehovah igaandam kini.*”

Dili ba mao kini ang labing malisud nga pagsulay nga gihatag sa Dios kang Abraham? Oo, lisud kaayo nga pagsulay, apan pinaagi niini ang Dios nagapakita kanato ug duha ka maanindot nga mga kamatuoran:

- a) Ang Dios nagahatag ug usa ka hulagway sa Iyang daku nga gugma alang kanato pinaagi sa paghatag sa Iyang bugtong Anak, ang Ginoong Jesu-Cristo, aron magpakamatay sa ibabaw sa krus. Ang kasaysayan ni Isaac usa ka hulagway sa pagkamasinugtanon ni Cristo sa kabubut-on sa Dios. Si Isaac nagmasinugtanon sa kabubut-on sa iyang amahan sa dihang gidala siya didto sa bukid aron ihalad. Si Cristo, sa lain nga bahin, misubay sa dalan ngadto sa kamatayon aron bayran ang atong mga kasal-anan. Siya nahimong karnero, ang halad sa sala ngadto sa Dios.
- b) Ang Dios mipamatuod nganhi kanato sa Iyang pagkamatinumanon sa Iyang mga saad. Ang pagsulay ni Abraham gihatag alang sa atong pagtoon, Roma 4:13-25. Kita usab karon nga wala magabuhat, apan nagasalig Kaniya nga nagamatarung sa mga dili diosnon, ang atong pagtoo ginaisip nga atong pagkamatarung, Roma 4:5. Unang-una, kinahanglan kita motoo kang Jesu-Cristo nga namatay alang sa atong mga sala, gilubong Siya ug nabanhaw gikan sa kamatayon sa ika tulo ka adlaw, 1 Cor. 15:1-4.

Si Abraham nakadawat ug dagkung mga ganti ug daghan pa nga mga saad human siya nakalabang sa maong pagsulay, Genesis 22:15-18. Mao man usab, kita magadawat sa saad sa tanang mga butang diha kang Cristo sa takna nga kita mosalig Kaniya ug motoo sa Dios. *Ang Dios magatagana*, Roma 8:28-39.

Atong sundon si Abraham pinaagi sa dili pagkaluya sa atong pagtoo; apan magatubo unta kita sa atong pagtoo pinaagi sa paghatag himaya sa Dios, ug masaligon nga ang Dios makahimo gayud pagtuman sa Iyang mga saad. Sa sunod nga pagtulon-an, magatambong kita sa usa ka kasal diha sa DALAN SA SAAD.

SAG-ULOHON NGA BERSIKULO: “Diha kaniya wala ang kakulang sa pagtoo nga arang makapahimo kaniya nga maduhaduhaon sa mga saad sa Dios, hinonoa sa naghimaya siya sa Dios, mitubo siya nga malig-on sa iyang pagtoo, masaligon sa hingpit nga ang Dios arang makatuman sa Iyang gisaad.” Roma 4:20-21.

PAGTULON-AN 6 – BULOHATON

Direksyon: Isulat ang hustong tubag sa mga pamahayag o pangutana.

1. Butangi ang linya sa mga ngalan niining dapita sa atong mapa:
 - a. Dalan sa _____
 - b. Dalan sa mga _____
 - c. Kanto sa _____
- DAKUNG LUNOP -
 - d. Tanaman sa _____
 - e. Sakyanan sa _____
2. Human sa Tore sa Babel, ang Dios nagtawag kang _____ aron magsugod ug usa ka bag-o nga plano. Genesis 12:1.
3. Ang Dios misaad ug pito (7) ka mga butang kang Abram. Basaha ang Genesis 12:1-3 ug isulat kung unsa kini.
 - a. Ako kang himoon nga usa ka daku nga _____;
 - b. Ako _____ kanimo;
 - c. Ako magahimo sa imong _____ nga daku;
 - d. Ikaw mahimong _____;
 - e. Ako magapanalangin kanila nga _____;
 - f. Ako magapanghimaraut sa _____ kanimo;
 - g. Ug diha kanimo ang tanang _____ sa _____ mapanalanginan.
4. Si Abraham mitoo sa Dios ug kini giisip kaniya nga _____. Genesis 15:6.
5. Ang Dios nagasugo kang Abraham sa paghalad sa iyang _____ ingon nga halad nga sinunog. Genesis 22:2.
6. Si Abraham mitoo nga ang Dios makahimo sa _____ kang Isaac, bisan pa kon kini mamatay. Heb. 11:19.
7. Si Isaac tipo o hulagway sa atong _____. Juan 3:16.
8. Si Abraham usa ka hulagway sa _____ nga Amahan. Juan 3:16.
9. Ang Dios naghatag kanato ug daghan ug bililhong mga saad. Duha niini mao ang:
 - a. Buhat 16:31 – Tumoo ka sa Ginoong Jesus ug ikaw _____.
 - b. Filipos 4:19 – Ug ang akong Dios magahatag kaninyo sa tanang _____ sumala sa kadagaya sa Iyang himaya diha kang Cristo Jesus.
10. Isulat ang Roma 4:20-21: _____

